

translati sunt; magnificumque donum profecuta est elegantissima ad Christophorum Maurum, Ducem, universumque Senatum epistola, qua clauditur *Centuria philologicarum Epistolarum*, a Goldasto in lucem emissa. Declarat ibi causas Bessarion, quibus adductus Reipublicae maluerit, quam alii cuivis Principi, eos donare. Aliae autem duae causae addi possunt: quarum altera est, quia haud multis ante annis in Veneros patricos erat relatus; altera, ea consuetudo quae ipsum inter & Paullum Maurocenum, Zilii filium, intercedebat, quo hortatore largitionem illam factam esse, infra apparebit. In quibusdam antiquis hujus urbis Annalibus, quos legendos liberaliter mihi commodavit nobilissimus & optimus adolescens, scientiarumque omnium studiosissimus, Joannes-Baptista Venerius, Sebastiani filius, & quorum auctorem fuisse puto, sub exitum decimiquincti saeculi, Antonium Donatum, Equitem, Andreae item Equitis filium, ejus qui Foscaro Principi fuit gener, reperio XIII. kal. septembres M. CCCC. LXVIII. arcas triginta manuscriptorum voluminum plenas, quae publico in loco asservanda dono mittebat ad Rempublicam Bessarion Cardinalis, Venetias applicuisse, ei autem qui voluminum comes & custos advenerat, largitum Senatum esse quadringentos aureos nummos. Ejus veritatis habeo argumenta validissima, ex authenticis documentis actisque publicis decerpta, prout exstant primo *Regestorum* volumine apud amplissimos rei literariae Triumviros. Prima ejus munificae largitionis mentio ibi fit pag. 30. quo relatum est Senatusconsultum factum X. kal. apriles anni M. CCCC. LXVIII. cujus haec sunt verba.

„ 1468. die 23. Martii. in Rogatis.

„ Reverendissimus D. Cardinalis Nicenus, qui summo studio & diligentia accumulavit nongenta volumina optima & pulcherrima in utraque facultate latina & graeca pretii circiter 15000. ducatorum, hortatu & suasionibus nobilis viri Pauli Mauroceno contentus est largiri, ac dimittere ea Illustrissimae Dominationi nostrae, cum sit Nobilis noster, & de nostro gremio, ita tamen, ut locum in plateis nostris S. Marci convenientem & capacem deputare velimus, ut possit appellari Bibliotheca S. Marci. Cumque res haec maximum ornamentum allatura sit huic nostrae urbi:

„ Vadit pars, quod praefato Reverendissimo D. Cardinali scribatur, nos acceptasse libenter hanc suam liberalem oblationem, gratias agendo Reverendissimae Paternitati suae verbis convenientibus & opportunis. Et quod provisuri sumus de loco opportuno & apto ad dictam Bibliothecam. Ex nuncque captum sit, quod Collegium nostrum teneatur reducere se insimul uno die hujus septimanae proxima post prandium, & per omnes ratiocinari, & recordari debeat de loco digno & honorabili deputando pro dicta Bibliotheca, & postea veniatur ad hoc Consilium ad deliberandum.

„ De parte ——— 175

„ De non ——— 0

„ Non sinceri ——— 0

Ineunte autem majore censuerunt Patres, ut eo in loco ducalium aedium libri reponerentur, qui supra forum est: olim dicebatur vulgo *la sala novissima*, hodie *la sala dello Scrutinio*; ubi etiam quo tempore Sabell-